



*Sabtu, 26 Oktober 2024*  
**Ogen : 2 Samuel 14:28-33**



**Nangtang Singalah-ngalah**



**B**unda Teresia, sekalak tokoh si cukup terkenal i bas kekelengen ras perdamen. Kata bijak si pernah ibelaskenna nina " *apa yang dapat anda lakukan untuk mempromosikan perdamaian dunia? Pulanglah dan cintai keluarga anda.* "Kata enda mpersingeti kita maka perdamen doni enda ibenai i bas kekelengen i tengah-tengah jabu. Jabu e me doni si kitikna i bas doni enda. Adi jabu dame maka doni enda pe jadi dame, adi jabu sontar maka doni enda pe dem i bas kiniladamen.

Absalom anak Daud, enggo ngelakoken perbahanen si erbahanca la lit kedamen bas jabu. Daud merawa man Absalom, erkiteken ikuasai rawana ibunuhna seninana. Duana kalak enda nggeluh i bas kinibayaken, erjabaten; raja ras anak raja. Benaken persoalen si lit ngeluh pedauh-dauh. Bas ogenta enda duana ia, labo ndauh kal inganna tading, tapi la banci jumpa sabap langa ibere raja Daud ijin man Absalom guna jumpa ras ia. Lit dua tahun dekahna lalap la banci jumpa, erbahanca pusuh Absalom lalap la teneng. Erdandanken si e, idilona me si banci pejumpaken ia ras bapana Daud. Alu usaha silakokenna e, ipejumpaken me Absalom ras bapana. Reh Absalom, erjimpuh i lebe-lebe bapana, ncidahkan kinteruken ukurna rikut ras pengakun salah. Daud pe minter ndeheri anakna Absalom dingen ngemai ia. Tedeh si tedeh-tehen bage me kalak enda duana sedekah enda. Sedekah enda tedeh e itahan erkiteken rawa, nembah ate, emosi ras sidebanna, tapi kenca jumpa, radu ras sialemen, ngaloken sada ras sidebanna, erbahanca nangtang kerina singalah-ngalah. Tuhu ngalah kel adi ngeluh i bas permusuhen, elem-elem ras rawa. Sinasa lit la kepe banci nambarisa, selain erdame, benailah erdame teptep warina i bas jabu.